

Iuda

1

- ¹ NA Iuda he kauwa na Iesu Kristo, o ke kaikaina hoi o Iakobo, i ka poe i huikalaia e ke Akua ka Makua, a i malamaia hoi e Iesu Kristo, me ka heaia mai;
- ² I nui ko oukou lokomaikaiia mai, a me ka maluhia, a me ke alohaia mai.
- ³ E na punahele, i ka wa a'u i hooikaika ai e palapala aku ia oukou i ke ola nui, he mea pono ia'u ke palapala aku me ka nonoi ia oukou, e hooikaika qui oukou no ka manaoio i haawi mua ia mai na ka poe haipule.
- ⁴ No ka mea, ua komo maopopo ole mai kekahipoe kanaka i hoohewa mua ia mai ma keia hoopai ana, he poe aia, e hoolilo ana i ke aloha o ko kakou Akua i mea makaleho wale: a e hoole aku ana hoi i ke Akua i ke alii hookahi, i ko kakou Haku ia Iesu Kristo.
- ⁵ Ua makemake au e paipai i ko oukou manao; ua ike no oukou mamua, ua hoola mai ka Haku i kona poe kanaka mai ka aina mai o Aigupita, a mahope hoi luku iho la ia i ka poe manaoio ole aku.
- ⁶ O ka poe anela i hoomau ole ma ko lakou ano kahiko, aka, i haalele i ko lakou wahi i noho ai, ua hoana e oia ia lakou iloko o na kaula-hao mau loa ma ka pouli, no ka hookolokolo ana o ka la nui.

- ⁷ E like me ko Sodoma poe a me ko Gomora hoi, a
me ko na kulanakauhale e kokoke aku ana,
i lilo like me lakou nei i poe moe kolohe, me
ka hahai aku mamuli o na kino e, ua hoo-
liloia mai no lakou i mea hoike, e ehaeha
ana i ka hoopaiia ma ke ahi aa mau loa.
- ⁸ Pela no hoi keia poe moe uhane, ua hoohaumia
lakou la i ke kino, ua hoowahawaha aku i
na'lii, a ua hailiili aku hoi i na lunakiekie.
- ⁹ Aka hoi, o Mikaela ka luna anela, i kona wa i
hakaka ai me ka diabolo me ka hoopaapaa
ana aku no ke kino o Mose, aole ia i aa e
hailiili aku ia ia, aka, i olelo wale no ia, E
papa mai ka Haku ia oe.
- ¹⁰ Aka, ke hoowahawaha nei keia poe i ka mea
aoles lakou i ike; a o ka lakou mea hoi i ike
maoli ai e like me na holoholona uhane ole,
malaila no e hoohaumia ai lakou ia lakou
ihoh.
- ¹¹ Auwe lakou! no ka mea, ua hahai lakou ma ka
aoao o Kaina, ua holo kiki lakou ma ka lalau
ana o Balaama i mea e ukui'a'i, ua hokaiia
ihoh la lakou ma ke kipi ana ae o Kora.
- ¹² He mau pukoa ia mau mea ma ka oukou
mau ahaaina aloha, ua ahaaina hilahila ole
lakou me ka hanai ana ia lakou iho: he mau
ao ua ole i lele ino i ka makani; he mau laau
i mae wale, hua ole, i palua ka make ana, a
i hukiia ke aa;
- ¹³ He mau ale o ke kai i kupikipikio, ke huahuai ae
la i ko lakou hilahila iho: na hoku lele hoi;
ua hoomakaukauia no lakou ka poeleele o
ka pouli mau loa.

- 14** Wanana mai no o Enoka ia mau mea, o ka hiku ia mai Adamu mai, i mai la, Eia hoi, e holo mai ana ka Haku me ka umi tausani o kona poe hoano,
- 15** E hookolokolo mai i na mea a pau, a e hoahewa mai i ka poe aia a pau iwaena o lakou i na hewa a pau a lakou i hana hewa'i, a me na olelo paakiki a pau a ka poe hewa i olelo ino aku ai ia ia.
- 16** Oia ka poe ohumu, oluolu ole, e hele ana ma ko lakou kuko iho; haanui iho la ko lakou waha me ka olelo hookano aku, mahalo ae la hoi i ko ke kino no ka ukuia mai.
- 17** E na hoalauna, e hoomanao oukou i ka olelo i olelo mua ia mai ai e ka poe lunaolelo o ko kakou Haku o Iesu Kristo;
- 18** I ko lakou hai ana mai ia oukou, i ka hope o ka manawa, e hiki mai ai ka poe haakei e hele ana ma ko lakou kuko aia iho.
- 19** Eia ka poe i hookaawale ae ia lakou iho, ma ke kino lakou, aole ma ka Uhane.
- 20** A o oukou la, e na hoaaloa, e hookupaa ia oukou iho ma ko oukou manaoio hemolele loa, e pule aku ana ma ka Uhane Hemolele;
- 21** E malama ia oukou iho ma ke aloha o ke Akua, e kakali koi i ke aloha ana mai o ko kakou Haku o Iesu Kristo a hiki i ke ola mau loa ana.
- 22** E aloha aku oukou i kahi poe e hoolike ole ana.
- 23** A o kahi poe e hoola ae oukou ma ka makau, me ka huki ia lakou mai ke ahi mai; me ka inaina aku i ke kapa i paumaele i ko ke kino.

24 Eia hoi, i ka mea e hiki ai ke malama ia oukou
i ole ai e haule, e hooku mai hoi ia oukou i
hemolele imua i ke alo o kona nani me ka
hauoli nui aku;

25 I ke Akua akamai hookahi, ko kakou mea e ola'i,
nona no ka hoonaniiia, a me ka hanohano, a
me ka ikaika, a me ka mana i keia wa, a i ke
ao pau ole. Amene.

**Baibala Hemolele
The Holy Bible in the Hawaiian language of the United
States, 1868 revision**

Public Domain

Language: 'Olelo Hawai'i (Hawaiian)

Translation by: na na misionari i pai

2015-11-10

PDF generated using Haiola and XeLaTeX on 11 Nov 2022 from source files
dated 9 Oct 2020

4fde4536-9f74-574b-8404-d9ec34a30cbb